



Nicolaus patria Phorcensis ob ingenij felicitatem operam literis dedit, atq; post rudimenta in patria percepta sese ad doctorum hinc inde gymnasia contulit. In his Græcæ & Latinæ linguæ operam dedit, atq; earum usum sibi familiarē reddidit. Postea quoq; Iurisprudentiæ incubuit, atq; doctissimis Iureconsultis adnumeratus fuit. Itaq; Argentinam uocatus bonas literas promouit, atq; cunctis gratissimus extitit. quin etiam Historiarum lectione delectatus, antiquorum & recentium populorum res gestas explicauit, atq; abstrusa multo clariora effecit. Itaq; Iohannis Cuspiniani Chronica de Cæsaribus emendauit, atq; etiam eius Consules il-

lustrauit. eandem operam quoq; in Arriani historia Græca de rebus gestis Alexandri præstitit. Scripserat is quoq; Isagogen in tabulam Græciæ Nicolai Sophiani anno 1545, quam postea ita recognouit & auxit, ut in septem libros excreuerit, quibus quicquid in tota Græcia memorabile, & præcipuè dignum cognitu apud optimos quosq; authores extat, uelut uno fasce complexus est. Cum autem Nicolaus se totum studijs consecrarit, rem literariam multis alijs lucubrationibus exornaturum non dubitamus, præsertim cum ea iam ingenij documenta dederit, ut omnibus doctis passim innotuerit, & præclaram nominis famam adeptus sit. Conrad. Lycosth.